



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



Informacija o rezultatima ankete o inflacijskim očekivanjima iz juna 2026. godine



Inflacijska očekivanja imaju važnu ulogu u procjeni budućih ekonomskih kretanja, jer odražavaju način na koji tržišni učesnici procjenjuju moguće promjene u nivou cijena i ukupnim makroekonomskim uslovima. Njihovo kontinuirano praćenje doprinosi boljem razumijevanju ekonomskog okruženja i predstavlja značajnu osnovu za analizu potencijalnih rizika i budućih trendova.

Rezultati janskog kruga ankete ukazuju na povećanje očekivane stope inflacije u odnosu na martovski krug. Za 2026. godinu očekivana inflacija iznosi 4,40%, što predstavlja povećanje od 1,0 procentni poen, dok se za 2027. godinu očekuje usporavanje inflacije na 3,60%, ali i dalje na nivou koji je za 0,90 procentnih poena viši u odnosu na martovsku projekciju. Povećanje inflacijskih očekivanja može se dovesti u vezu s očekivanim rastom cijena energenata i hrane na međunarodnom tržištu, izraženom uvoznom zavisnošću Bosne i Hercegovine, rastom troškova rada i trajnim geopolitičkim neizvjesnostima koje utiču na cijene i troškove poslovanja. Istovremeno, niža očekivana stopa inflacije za 2027. godinu u odnosu na 2026. godinu ukazuje na očekivanja da će se inflatorni pritisci postepeno ublažavati usljed stabilizacije međunarodnih tržišta i smanjenja troškovnih pritisaka.

Savremena inflacijska kretanja i dalje su pod snažnim uticajem globalnih ekonomskih okolnosti. Tokom proteklog perioda međunarodna tržišta suočila su se s povećanom neizvjesnošću usljed promjena u trgovinskim odnosima, oscilacija cijena energenata i sirovina, kao i pojačanih geopolitičkih tenzija u više svjetskih regija. Za Bosnu i Hercegovinu, kao malu i otvorenu ekonomiju, međunarodna kretanja i dalje predstavljaju jedan od najvažnijih izvora inflacijskih pritisaka. S obzirom na visok stepen uvozne zavisnosti, posebno kada je riječ o energentima, prehrambenim proizvodima i industrijskim sirovinama, promjene cijena na svjetskim tržištima relativno brzo se prenose na domaće tržište. Istovremeno, domaći faktori, uključujući kretanja lične potrošnje, troškove rada i dinamiku pojedinih administrativno regulisanih cijena, mogu dodatno uticati na ukupni nivo inflacije.

U narednom periodu očekuje se da će dinamika inflacije u najvećoj mjeri zavisiti od razvoja globalnih ekonomskih prilika, stabilnosti međunarodnih tržišta energije i hrane, kao i intenziteta geopolitičkih rizika. Ukoliko ne dođe do novih značajnijih poremećaja u međunarodnoj trgovini i lancima snabdijevanja, izgledno je postepeno smirivanje inflacijskih pritisaka i stabilizacija očekivanja učesnika na tržištu. Ipak, prisutna neizvjesnost zahtijeva kontinuirano praćenje ekonomskih pokazatelja, budući da bi eventualne promjene u globalnom okruženju mogle uticati na buduća inflacijska kretanja i ekonomske izgleda Bosne i Hercegovine.

